

四庫全書

子部

欽定四庫全書

子部

數學卷一至三

詳校官欽天監博士臣何元浩

靈臺郎臣倪廷梅覆勘

總校官進士臣朱鈐

校對官五官靈臺郎臣陳際新

謄錄監生臣駱應

欽定四庫全書

子部六

數學

天文算法類二

推步之屬

提要

臣等謹案數學八卷續一卷

國朝江永撰永有周禮疑義舉要已著錄是編
因梅文鼎歷算全書為之發明訂正而一準
欽定歷象考成折衷其異同一卷曰歷學補論皆因
文鼎之說而推闡所未言二卷曰歲實消長

文鼎論歲實消長以為高衝近冬至而歲餘
漸消過冬至而復漸長永則以為歲實本無
消長消長之故在高衝之行與小輪之改而
歲節氣相距近高衝者歲實稍贏近最高者
稍胸三卷曰恒氣註歷文鼎論冬至加減謂
當如西法用定氣不用恒氣而所作疑問補
等書又謂當如舊法用恒氣註歷永則以為
冬至既不用恒氣則諸節亦皆當用定氣不

用恒氣故此二卷皆條列文鼎之說而以所
見辨於下四卷曰冬至權度元史六厯冬至
載晉獻公以來四十九事文鼎因作春秋冬
至考刪去晉獻公一事各以其本法推求其
故永則以為算術雖明而未有折衷更因文
鼎之法考證厯法史志之誤五卷曰七政衍
文鼎論七政小輪之動由本天之動七政之
動由小輪之動永則以恭按

欽定歷象考成五星有三小輪而月更有次均輪且更有圓圖文鼎說雖精當而各輪之左旋右旋與帶動自動不動之異尚未能詳剖因各為圖說以明之六曰金水發微文鼎仍初舊法以金水二星伏見輪同於歲輪後因門人劉允恭悟得金水二星自有歲輪而伏見輪乃其繞日圓象因詳為之說後楊學山乃頗以為疑永謂文鼎說是學山疑非因為圖說

以明之七曰中西合法擬草明徐光啓酌定
新法凡正朔閏月之類從中不從西定氣整
度之類從西不從中然因用定氣遂以每月
中氣時刻為太常過宮時刻繫以中法十二
宮之名而西法十二宮之名又用之於表永
病其錯互又整度一事永亦病其言之未盡
故著此論以辨之亦多推文鼎之說八曰算
牘則推行三角諸法求其捷要續歷學一卷

曰正弧三角疏義以補算牘所未盡故八卷
各有小序此卷獨無也文鼎厯算推為絕技
此更因所已具得所未詳踵事而增愈推愈
密其於測驗亦可謂深有發明矣乾隆四十
六年十一月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

數學卷一

婺源江永撰

歷學補論

勿菴先生歷學疑闕三卷五十二章又補二卷
二十四章已為歷法疏通源流指示寔與永熟
味其書別有觸悟隨筆識之或贊說於本書之
外或衍釋於本書之中泰山河海無俟一卷一
勺聊自道其管
蠡窺測云爾

論天地開闢

問天地固當有始如陳星川壤天地人三元之說一元
有二千四百一十九萬二千年今當人元四百五十六
萬六千餘年者固為荒唐矣邵子皇極經世書謂一元
有十二萬九千六百年分十二會一會一萬八百年天
開於子地闢於丑人生於寅禹即位後八年而入未會
則自天開至今七萬餘年生人至今亦五萬餘年世以
邵子精於數學也而信之自西士之書出則自開闢以
來只五六千年何若是其不侔耶果孰非而孰是耶曰

以理斷之疑西說近是也中國有載籍始於唐虞堯至
今四千餘年堯以前略有傳聞而難徵信度有人物之
初距唐虞之世其年當不甚遠豈有遙遙五六萬年晦
冥如夜竟無紀載可稽耶又大西洋載其國古老所記
亦似不過四千年夫中國相去數萬里而年數符同若
斯則四千年以前徧天地有人物者不過一二千年如
今日之視秦漢已耳當不以萬計也顧天地之開闢雖
有最初之年而其醞釀於未開闢之先者必需積漸之

久如人獸之胎蟲鳥之卵草木之果實根莖皆含生於
未生之前此則不知幾何年耳曰西士之言固可信矣
其紀年亦自不同天地儀書謂自開闢至崇禎庚辰五
千六百三十餘年聖經直解則云六千八百三十六年
依稽古定儀推之則五千七百三十年月離厯指則謂
崇禎戊辰為總期之六千三百四十一年諸說孰為是
耶曰予嘗推之矣其言五千餘年是開闢之始太陽最
高在春分也此則稽古定儀之年為近

元至元辛巳高
衡在冬至最高

在夏至開闢以來行一象限九十度以今厯一年行一分一秒一十微推之九十度有五千三百餘年稽古定儀開闢至至元辛巳其言六千餘年是開闢之始冬至五千三百七十年

日躔壁宿為亥末戌初也此則聖經直解之年為近

崇禎

庚辰冬至日在箕四度溯前六千八百三十餘年約退九十八度日在壁

二者皆有理不知

果孰為確耳曰然則古厯家謂上元必是甲子歲前十月甲子朔旦夜半冬至日月如合璧五星如連珠其說信然乎曰未必然也天地開闢如人之初生已屬後天其始尚有胚胎之歲月則甲子日月五星不必皆從

始處始也以為始於甲子歲安知其不始於他年乎

西書

諸說皆非

甲子

以為始於十一月朔安知其不始於十一月望

乎

冬至為中氣望為月半

以為始於冬至安知其不始於春分乎

天文實用云開闢初時適當春分又云中西皆以角為宿首因開闢首日昏時角為中星也

以為始

於甲子夜半則時刻隨方有里差西方見早東方見晚

西以為子東以為丑東以為子西以為亥徧大地當以

何處為正位而定其為夜半冬至乎日月果合璧則開

闢之始必日食乎五星僅連珠不猶有未齊同者乎且

日月五星各有性情以為始於聚安知其不始於散乎

如人身胚胎之始則聚及其成形臟腑官骸各有部位

達理者默而觀之母泥前

人之說可也以今歲周計之一歲小餘一百二十八分
日之三十一積一百二十八年四萬六千七百五十一
日無餘分以六十乘一百二十八凡七千六百八十年
積二百八十零萬五千零六十日天正冬至得甲子年
甲子日無餘分使開闢之年果在甲子其冬至當自平
者始以今日平冬至逆推終不能得甲子朔旦冬至在

中國之夜半也而況五星又皆齊同乎以是知厯元不可推也開闢之年約略可知而不可定也

論地圓

問地為圓形周圍九萬里南北則以二極之低昂而知

之

南北行二百五十里極高下差一度

東西則以月食之蚤晚而知之

地赤

道經東西相距七千五百里則月食先後差一時

此惟知厯者能信又必如西

人浮海數萬里見南極出地數十度而後可驗若拘儒之見不出戶牖囿於方隅終疑人不可側立水不可倒

懸告以地圓謂其言猶河漢也柰何曰地之繇亘甚廣其圓也以漸人雖繞地行一周恒以足履地首戴天必無倒立之時水之附地而流亦猶是也今試泛舟於江湖登舟之高處望之水之來不見其端水之去不見其尾但覺微有灣環之形惟舟所到即是高處此何也人目能望數十里此數十里即以漸而圓故也而地圓之最可見者如月食於地景月之虧必作灣形由地景圓故也使地不圓何以有此圓景乎曰地上山高而海深

形有凹凸安得圓曰地之厚二萬八千餘里山海雖極
高深如胡桃核之皺略有起伏終不礙為圓也或又設
一難曰地誠圓矣地之下誠有人居之矣設使地有孔
穴上下穿通人投石於穴中此地見石墜而下彼地之人
不見石騰而上直至於天乎石惟能下豈能上乎曰此
說不足以難地圓也萬一有穿通之穴投石其中此石
必至地心而止心者四面之極處氣之所輳必不令此
石得過也以地球之大尚為大氣舉之處於天心而況

石乎

梅先生謂周髀中即有地圓之理又謂周髀所傳之說必在唐虞以前此皆篤論自古籍散亡中土厯家既失其說而又雜以臆度之見無理之譚如云地有八柱又云地是水載又云地有四游種種謬論塗人耳目即如王蕃言北極出地三十六度此不過就中土地中洛陽北一帶所見極高言之非可以此槩大地也唐一行嘗四方測景未悟地圓郭若思測景尤廣南至南海北盡

北海凡二十七所各紀其方北極出地晝夜永短似已
悟地圓之理而亦未能明白著論意其猶在疑信之間
今地圓之說大顯是數千年來失者復得歷家據以為
測算之根而儒家亦藉為窮理之要可不謂厚幸乎

戰國

時鄒衍談天謂九州之外有大瀛海環之亦似本之於周髀

梅先生引大戴禮曾子答單離居之間以證地圓之論
古已有之極確愚謂易大傳曰坤至靜而德方中庸曰
振河海而不洩皆地圓之證也方言其德則形體非方

可知矣水附於地而流地振之而不洩則地面四方有水非是水載可知矣

梅先生又謂地實圓體而有背面中土篤生神聖繼天建極垂世立教如人有面為一身精神所聚此真至之理非徒為尊中國之言昔有問於愚者謂列宿分野大地所共中國之地有限何得據之以為占愚思之梅先生此說亦可參悟蓋五臟之精開竅於五官則天光下臨其精氣與中華相屬者必尤切是以普天星宿皆有

相關之理也

論天大地小

問地球周九萬里不為小矣而西儒謂天極大地在天中只一點其言果可信與仰而望之日月星辰皆在目天豈若是其寥廓與曰此不可以臆揣也唯精於三角八線割圓之術因七政之行度比次其高下而各種之天去地之數可得即恒星以上無法可算者亦可想而知矣姑以太陽與土星兩重天言之西史第谷後出最

精歷算者測太陽行度得其高卑之中處距地一千一

百五十地半徑

此數仍未確今算一千一百四十二地半徑弱

夫地半徑一萬

四千一百三十餘里

以周徑密率算

以一一四二乘之則日去

地有一千六百餘萬里有奇又地周九萬里亦以一一

四二乘之則日天之周一萬零二百七十八萬餘里可

謂大矣而猶未也火木土三星之天皆在日天之上而

各星所行之歲輪

遲疾輪

皆與日天等大因其行歲輪一

象限九十度視黃道上得幾何度因以測其本輪均輪

次輪之半徑而知此星之天去地視日天得若干倍火星不及約半倍木星不及約五倍土星行歲輪九十度其視度五度半有奇其切線一萬零四百有奇夫輪之半徑十萬而五度半有奇之切線一萬零四百有奇則不止十之一其視日天之高十倍有奇矣又設土星行最高而當合伏其距地心一十二萬六千一百一十七有奇以太陽本天比例為十一倍又一三七三二四地半徑有一萬二千八百零八弱則土星最高而合伏距

地蓋一萬八千零九十七萬餘里矣此以星行度實算得之非荒唐之比也土星之高已如此矣而恒星之天又在土星之上雖無歲輪可測算而以右旋之遲速約略計之日一歲而一周火星二年弱一周高於日天半倍弱木星十二年一周高於日天不及五倍土星二十九年半一周高於日天不啻十倍恒星右旋二萬五千餘年一周則高於日天甚遠可知矣况宗動天又在恒星之上常靜天又在宗動之上其高不可思議其視地

不猶一微塵乎或曰地小於天如此則日入地下其光當從四旁射上地上可不夜矣而深夜黑暗何也曰地為實體日光不照則成黑影人處地面正當黑影最深最濶之處

地徑二萬八千餘里則影徑亦如之漸高乃漸減

安得不夜且氣無

質不能受日光能受日光者唯月與星有月則能透日光返照而夜明有星則微明月星皆隱則地上之氣全黑而夜甚暗矣故地雖小而自能成晝夜也

問各星歲輪與日天等大土木火三星本天固可以日

天半徑略計倍數矣若日天半徑倍於地半徑者一千一百四十二何從得之曰太陽本輪均輪之半徑既可以盈縮極差推而知則最高時在均輪之底最卑時在均輪之頂亦可得其相距之數矣而最高最卑太陽則有視徑差又射地景至月天則有景徑差又太陽近地平則有地面地心高下差合茲數差參互推算而日天距地可得而知矣豈若舊說言天去地若干萬里荒唐無稽者哉

論日月地三體大小

問人視日月其大似無幾而西人言日大於地月小於地日之大於地與月者其相去懸絕得毋無徵不信乎何以知其然也曰此亦以三角八線割圓之術測其本天去地之高下因以視徑而知其實徑與實體也日月之行因其盈縮遲疾而知小輪之徑因小輪而知大輪之徑故日去地一千一百四十二地半徑月去地約五十八地半徑凡去地半徑一倍者其度亦濶一倍地一

度二百五十里以一千一百四十二乘之則日天之度

計二十八萬五千餘里日之視徑半度有奇

約六十分度之三

一約得一十五萬里地之全徑二萬八千餘里故西人言日徑得地徑者五又七十五之十四此日之實徑也以五十八乘二百五十里則月天之度一萬四千五百里月之視徑比日視徑稍大約六十分度之三十二分奇其徑約八千里地徑大於月徑三倍半有奇此月之實徑也若以日視月則日徑大於月徑約一十九倍凡

此皆以實測實算得之非虛言也曰此有實據可考驗
乎曰有月之食也食於地景景徑約一度半

日月行度
有高卑則

景徑有大小此
以其中者言之

則日月地三者之大小可參考而知凡

光體等於實體則其景等大而無窮光體小於實體則
其景漸遠漸大而無窮唯光體大於實體則其景漸遠

漸小而有盡地景能食月不能食星月天卑星天高故

也

張衡靈憲謂闔虛星
值之則星亡者非是

觀月所處之天地景一度有半

約二萬二千餘里則日之大於地幾何月之小於地幾

何皆可用法推算矣曰日徑大於地徑五倍有奇而西
人又言日大於地球一百六十五倍奇日大於月徑約
十九倍而西人又言大於月六千五百三十八倍奇地
徑大於月三倍半有奇而西人又言大於月三十八倍
奇何若是之不倫耶曰前以徑相較者平圓也此以實
體相較者渾圓也算渾圓實體之法以徑自乘又以徑
乘之而得實體之圓分積兩圓相較可得其差

借立方
算渾圓

詳見
算勝

今用法推算則日之實體大於地者一百四十九

倍奇大於月者六千五百九十倍奇地之實體大於月者四十倍奇與西人之算或多或少蓋利西泰測箕里數小有不同耳

利氏說見天學初函

梅先生似以日大於地一百

六十五倍者為徑也故謂兩數相懸不啻霄壤若以實體較論則了然矣

方密之通雅不信日大於地百餘倍謂日光甚烈人在地上必死亦考之未詳耳

論日月星皆有質

問日月星皆氣為之乎抑實有其質乎曰實有其質也其實非金非玉非石蓋自有其質非人世所有者也若但

有氣無質豈能終古不改變乎西士以遠鏡窺日月亦不正圓而月中之黑處古人妄謂蟾蜍顧兔宋人誤以為山河大地之影者西人則名之為月駁謂由月體自生如地有巖洞日光照不到處則現黑影此非實有質而何日月如此星可知矣曰三光唯有氣也故能浮空若實有質何以不墜曰日月星各有其本天其本天皆以地為心地即其所著之根而日月星又各著於小輪之上其根甚固安得墜如地球極重終古亦不墜素問所謂

大氣舉之是也曰地球正當天心四面皆氣轉之故能
空懸於天中若日月星之重體在天上何以不墜曰物
各有其性情三光之性情麗天者也天猶水也水不能浮
沙石而能載大木木之性情自不沈也又何疑焉曰星
有隕為石者豈非有質即不能浮空與曰隕石之星非
天星也由地上火土之氣上衝火際偶然融結而隕也
豈有恒星天之星而或隕者哉

微茫之恒星
亦大於地

論青蒙氣

問西人謂近地平有青蒙氣其高約九里澤國彌厚彌高日月在蒙氣內小可為大卑可為高其說信然與曰信也凡徹體之物如氣如水如玻璃水晶皆能變物之形遠可使近小可使大直可使曲深可使淺卑可使高遠鏡其顯者也插篙於水置錢於盂無不可驗是以日月出地與將入地視徑加大蒙氣映之故也不唯加大而已更能升之使高實未出地而已出地也雖已入地而猶未入也故西人論日食於高卑南北東西三差

之外更有青蒙氣差青蒙徑差此為帶食言之也有此
二差則旦暮日食以東西差加減之而當食者蒙氣或
升之而不食矣其不當食者或升之而見食矣視徑加
大則能變食限與加時早晚食分多少矣此非臺官所
能預定必隨方測候而後可知前史有書當食不食不當
食而食者其故或由此與梅先生未嘗言及青蒙氣謂湯
羅諸公已言之耳學者固不可不知○列子載兩小兒辨
日一謂日初出時如車蓋日中如盤盂為近大而遠小此

未知蒙氣之故耳日何嘗有遠近若論遠近之微者則日
近地平時與近天頂時差一地半徑初出較遠日中較近
正與此小兒之說反又非近者熱遠者涼之謂也

論左旋右旋

問天左旋日月五星右轉厯家之說也謂日月五星亦
左旋其說始於橫渠張子與曰非也張子云天左旋處
其中者順之少遲則反右矣張子之意謂地亦是動物
處於天中隨天而左旋但少遲故覺地右而天左觀其

前兩章云日月五星逆天而行并包乎地者也地在氣中雖順天左旋其所繫辰象隨之稍遲則反移徙而右又云古今謂天左旋此直至粗之論爾恒星所行為晝夜者直以地氣乘機左旋於中云云則張子之意可知矣朱子謂橫渠說天左旋日月亦左旋其說極是是以處其中者為日月恐非張子之本意曰然則朱子謂天行過一度又謂厯家截其退數便於算又有大輪在外小輪載日月在內之喻若何曰愚向亦疑之謂日月果

因行少遲而覺其右轉則當循赤道而退無南北斜行之勢何為日自行黃道斜交於赤道月五星各有道又斜交於黃道乎何為恒星亦循黃道而右行乎後見勿菴先生說乃始豁然先生以鈞盤飛輪為喻謂如有小盤小輪附於大盤大輪之上而別為之樞則必相差而成動移以生逆度又必與本樞相應而成斜轉之象焉夫其退逆而右也因其兩輪相疊其退轉而斜行也因於各有本樞而其所以能退逆而斜轉者則以其隨大

輪之行而生此動移也此說極當朱子兩輪之喻未及不同樞必得此論始為精密盡善耳

左旋右旋之說愚前後有三見始也信朱子取正蒙之說後因細讀正蒙覺張子之意不如是又見西人有隨動自動之說謂七政自有性情力雖隨天動却能自動而右旋深信之乃別為之說謂凡物之理有順必有逆在天有氣者皆左旋有形者皆右轉一順一逆所以能成造化若使皆順而無逆則如水之無灣山之無轉不

能鍾地脉而居人物矣古人有蟻行磨之喻然蟻雖隨磨左旋而蟻之頭足自向東而右行若使蟻亦向西則蟻之行不反速於磨乎後讀梅先生書乃仍從左旋之說與始者所見却又不同此可驗愚學識之進退消長而所得益於先生之書此尤其大者矣

然則後之所見與順逆之說不相妨乎曰無妨也造化之理即以順而成逆如五行皆順生而自有逆克也如山水皆順行而自有逆轉也天以層數生遲速以遲速

成順逆正造化之妙也然則磨蟻之說若相妨奈何曰
日月在天非若蟻之行磨也輪載日月輪動而日月隨
之日月未嘗動也此如別有輪附于磨與磨同轉而不
同樞因生退度蟻則定於輪上未嘗行也

大氣之運如水逝風行恒星七政如有數舟同汎於江
河得風多者行速得風少者行遲彼此相較遲者若退
而上矣舟各斜迤不與岸平行舟之斜迤猶行黃道岸猶赤道斜迤又
不同勢則各舟挨柁定向不同也如各曜自有道

右粗譬之如此細論之舟猶非七曜也本天載本輪本輪載均輪均輪載日而月五星更有次輪星體在次輪上月體在次均輪上然則水猶本天舟猶本輪均輪次輪等猶舟上復有轉輪而日與六曜猶有球附於舟之輪上也

論天極

問自古只言北極西士始言有黃極而月與五星之道皆斜出入於黃道則月道又自有極五星道又各有極

然則七政七極并北極而八并南方相對之極而十六何若是其紛錯與曰七政各行一道即各有所宗之極北極為心黃極環繞而成一圜月與五星之極皆以黃極為心各環之而成小圜水星圜最大月次之金次之土次之火次之木次之皆載於黃極圜之上各有條理未嘗紛錯也

小圜自內而外由近而遠木火土金水似順五行相生之序月亦水類在金水之間

曰天之有北極也如磨之臍如輪之轂太陽曷不宗之乃自為極以成斜出之道與赤道度齟齬不相當何也

曰太陽若宗北極則恒行赤道無寒暑進退何以能生萬物有北極赤道又有黃極黃道所以能成變化也蓋北極體也黃極用也北極為心黃極繞之而成圈則又未嘗不宗北極也曰月與五星之道何為斜絡黃道曰日君也月與五星臣也不敢正行黃道而又不與之遠離君臣之義也

問古人以恒星之天為天西士則謂恒星亦隨黃道而東行夫恒星在七曜之上宗北極循赤道可矣何為亦

宗黃極循黃道曰北極唯宗動天宗之恒星自為一重
天則不得宗北極矣曰月五星各有道有極恒星天既
自為一重宜亦自有其道與極何為皆宗黃極而循黃
道恒星距黃極有定距曰六曜專而恒星散也六曜不惟自有道
而已道之上且有數小輪以載曜體焉恒星不能逐星
生小輪故普天星宿同宗黃極而循黃道也

論七政小輪

梅先生論小輪數章綦詳因其言而推測之太陽小輪

有二一為本輪一為均輪本輪之心在本天均輪之心
在本輪而太陽之體實在均輪之上其大小則本輪半
徑三均輪半徑一其行度則本輪之心右旋於本天而
均輪之心左旋於本輪均輪雖左旋於本輪而太陽在
均輪周實右旋均輪心左旋一度則均輪周左旋兩度
故最高最卑兩點雖常在本輪之頂與底而太陽之在
最高也不在均輪之頂而在均輪之底其在最卑也不
在均輪之底而在均輪之頂蓋不同心圈上所切之小

輪非本輪也乃合本輪均輪兩半徑而為小輪之半徑也又均輪實為太陽之體所居欲算太陽距地心得其徑差景差必須以均輪行度算之蓋本天載本輪本輪載均輪均輪載太陽此天上實象若并本輪均輪兩半徑以為不同心差規一大圈為不同心圈此則假借虛

象耳

聯兩半徑邊上虛迹而成圈

雖算加減均度與用本輪均輪立

算者不殊

均輪上太陽所到與兩半徑併之小輪邊上所切高下不同而從地心出線穿太陽其角

則同故所得之均度必無不同

而不可以此算視徑之大小

太陽實體不在不同

心圈上
故也

觀歷書太陽視半徑表本以本輪均輪算得之
若以不同心立算則其數不如此矣梅先生謂不同心
之法生於小輪而小輪為本法此誠不易之論也太陰
小輪遞相負乘與太陽五星特異本天載本輪本輪載
均輪猶之太陽而月之體不在均輪之上又五星次輪
在均輪上者其心也若月次輪則以輪邊與均輪相切
而別有負圈合均輪全徑次輪半徑以為半徑則負圈
心在均輪上而次輪心在負圈上與五星異矣五星之

體即在次輪之上而月則又有次均輪在次輪上月之實體則在次均輪上與五星又異矣細讀厯象考成始知其故

回回厯七政皆有中心行度似本輪行於本天而梅先生云小輪心非能自動小輪之動本天之動也七政亦非自動七政之動小輪之動也又云小輪心者小輪之樞也樞連於本天不動故輪能動而七政者又相連於小輪之周者也小輪動則七政動矣此皆發前人所未

發若小輪之動有左旋有右旋有不動其起點有在輪底有在輪頂其行度有平有倍有再倍又七政雖連於小輪之周而七政之體上下却有定位不隨輪而顛倒愚於七政衍詳言之七政各有本天本天上各有小輪小輪又互有同異視之若無測之實有紛綸交錯條貫秩然雖有大巧莫能摹肖是大園中之至巧

論日差

問歷書日躔有日差表月離又有日差表交食有加減

時表月離之日差表與加減時同但加減倒用

加減用
時為平

時若日躔日差其數絕異何也曰梅先生嘗疑日躔表

說支離蒙混此事當究其源而論之凡云時者有二一
為十二時之數太陽一日東升西沒徧厯太虛常靜之
天均剖之為十二段所以紀出沒永短節氣朔望之節
度者也一為十二時之位人所居之方必有正南正北
之子午圈視太陽正當午位為午正其對衝為子正從
此分十二宮者所以為測候七政之用者也此二者皆

以赤道為宗平剖赤道一宮得三十度一時應之數與
位其根本同所以有日差者一由太陽有平行視行而
有均度之差一由赤道黃道正升斜升而又有升度之
差是以厯家所算之時刻與太陽所到之方位略有不
同所算者實時平時所到者視時用時也日躔日差表
說亦明言日差之故有二一由太陽平視兩行差一由
兩道正球升度差及其解說作表之法却不分明而所
定各節氣加減分數亦絕不可解

後詳
言之

宜勿菴先生識

之然月離交食二表只說黃赤升度差立算而不論太陽之加減差疑其法之未確先生始疑日差有二根當立二表後又自謂不確而別為之說謂西歷之傳各有師授不同日躔表之兼用二根或是初說其平時定時乃測驗之實用必是後來之說宜只用月離交食二表為是愚向者亦未敢斷其是非後考之厯象考成所以求用時者兼用均度升度二差而日躔日差表棄而不用則二根兼用者為是先生始謂當立二表者亦是而

日躔之日差表立算未真解說支離洵不可承用也
太陽平視兩行差當從最卑最高起算至春分則積二
度有奇減時當八分有奇而表以春分起算謂春分平
視兩行略等此時無加減分夫春分既無加減則秋分
宜亦無加減表於秋分則加十六分時差十六分當天
之四度此四度之差從何得之其不可解一也高卑加
減之極在三宮九宮升度加減之極在四立節四立節
之加減最大者不過九分五十六秒謂升度差最大者

二度半稍弱也以此為限再以平視兩行差加減之相
去不甚遠表於立春減八分立夏加十一分立秋加三
分立冬加二十四分何若是不均其不可解二也二根
加減其數常均合之當亦必均表於初宮十九度後始
有減分減至春分而極春分後則恒用加計一歲加減
之數減者一而加者四其不可解三也合二根加減不
過十八分有奇兩大之限不同時又不能及此數而表
之加分大者二十四分當天六度此數又從何得之其

不可解四也升度差有定時而太陽高卑有行度其兩行之差不恒繫於節氣表乃合之為一若可恒用者然其不可解五也此表監中承用數十年近始遵用厯象考成豈久之始覺其未確乎

厯象考成求用時之法云以本日太陽均數變時得均數

時差

本註云均數為加者時差為減均數減者時差為加

又以本日太陽黃赤經度相減餘

數變時得升度時差

註云二分後為加二至後為減

乃以兩時差相加

減為時差總

註云兩時差同為加者則相併為總其號仍為加同為減者亦相併為總其號為減

兩時差一加一減者則相減為總
加數大為加號減數大為減號

若算太陰平行則以

時差總化秒與一小時太陰平行相乘為實以一小時

化秒為法除之得數為秒以分收之得時差行以加減

太陰平行

時差總為加者則減為減者則加

為用時太陰平行若算交

食求實朔實望用時則以時差總加減實朔實望為實

朔實望用時按此求時差之法甚分明觀此可知日躔

表之誤而月離交食二表僅得其半於理亦未盡矣究

之亦不必立兩表惟以交食加減時表為主而以均度

變時差加減之蓋變時之法甚易一度變時之四分十五分變時之一分一分變時之四秒可約而知不必須

表也

加減時表當正其名曰黃赤升度時差表

黃赤升度之時差易見太陽均度之時差難知均度所以有時差者何也太陽在天終古平行厯家步算一切以平行為本一年之根起於冬至次日子正時此平時之平度也而有高卑之輪太陽行其上則黃道上有視行加減之度而平行之度在本輪之心與人目所見太

陽異處則時差生於此矣夫常靜天之析為十二宮均
剖者也一日之分為十二宮亦均剖者也以均剖者算
行度則時刻之能應天者太陽本輪心所到之平度耳
若本輪上有加減之度逐日所算太陽加時必與太陽
所加之時位有微差

一度為時
之四分

何也輪心與輪邊所當

不同也設平春分在丙寅日午正而定春分在甲子日
午正相差約兩度則甲子日欲測太陽正交赤道必於
所算午正時減八分為午初三刻七分於正南之位偏

東二度測之此時正當交點則所算甲子日午正初刻
春分者真矣何也甲子日本為平行二宮二十八度
之日距三宮初度有二度當未至午正二度之時而入
交則本輪心豈不正當午位乎若再加時八分太陽正
當午位則本輪心又移過午正西二度矣此均度所以
有時差之理也論太陽右旋一晝夜行一度弱論太陽
左旋一晝夜行三百六十度太陽既有加減差則右旋
者差在日其極差二日有奇左旋者差在時其極差八

分有奇本輪上九宮至三宮太陽行下半周右旋盈則左旋縮十二時行三百六十度而不足不足則時差當減矣三宮至九宮太陽行上半周右旋縮則左旋盈十二時行三百六十度而有餘有餘則時差當加矣然加時之始不於三宮而於六宮減時之始不於九宮而於初宮蓋三九宮為縮與盈之極三宮至六宮盈其所縮九宮至初宮縮其所盈也總之輪心所到為平時太陽所到為視時故以本日均數變時而反其加減於理為

盡

梅先生有日差原理一卷未刻愚以意推測如此

唯四正日但有均度時差過此則兼有升度時差故當合兩時差相併相減以為時差總其法至今日始定

論太陽倍離

天以太陽為尊能攝月與五星西史第谷謂如磁石之引鐵確喻也月五星離日有遠近而生次輪之行五星次輪一度即為一度獨太陰離日一度次輪上即有兩度五星合伏至合伏次輪一周太陰朔至望望至朔次

輪再周回歷謂之倍離其故何與此由月次輪與五星不同故也五星次輪心在均輪上而月次輪心在負圈上次輪與均輪以邊相切其相切之點即初均割線所到謂之次輪最近點最近者最近於均輪之心也定朔定望起於此點由此左旋至上弦而最遠至望復於起點又至下弦而最遠至朔再復於起點點在輪周則度亦起於輪周凡割圓之理從輪心出線論度者一度為一度從輪周出線論度者兩度為一度此月所以倍離

也試從次輪最近點出一直線分次輪為兩半又從點
出一橫線與直線十字相交夾次輪半周於中間夫十
字相交者直角也直角所夾之度必九十度而次輪則
已半周豈不兩度當一度乎

論太陰遲疾

問授時分太陰為一百六十八限算其遲疾似密於古
以今法較之授時猶未能與天密合也按月離加減表
三宮九宮初度減均加均積度四度五十八分二十秒

變為日度五度。四四五有奇耳而遲疾立成八十四限所益所損之積度五度四二九有奇則其數大於加減均度矣。朔望後行次輪更有二三均加減大者二度四十八分併初均加減七度有奇而授時無此損益分則其積差有至二度有奇者矣。安能與天密合曰授時之分限算遲疾蓋由積候而得豈積差至一度有奇猶不之覺者乎曰月行最難測算者也三均之數甚糾紛地面地心視差又最大人所見在天之度往往非真度

當時雖屢測亦只得其大槩既不知有次輪之行又未得視差之真率是以不得不以近似者立法然則西法算太陰有二三均加減實勝中法之一大端也

凡月近入轉則疾近月孛則遲此本輪均輪上之遲疾也近朔望則疾近兩弦則遲此次輪次均輪上之遲疾也朔望又近入轉兩弦又近月孛則疾者愈疾一日不啻十五度遲者愈遲一日行十一度有奇

然則授時之遲疾法算定朔定望交食何以不甚差曰

朔望無次均加減故也

授時分太陰一轉三百三十六限之表今載之明史其實為無用之法也

論交食

梅先生交食蒙求交會管見二書備論算交食之理無餘蘊其以黃道交角變白道交角為定交角以定交角算日月光體之上下左右指其初虧復圓而不以東西南北為方位尤發前人所未發

交食蒙求註云若用弧三角法求白道限度所在及其距地之高並可得交角細數然所差不多蓋算交食必在朔望又必在交前交後故也按用弧三角求白道限即交會管見新立算白道九十度限高法是也竊疑交前交後白道斜穿黃道而過不能與黃道平行則變黃道交角為白道交角似有微差然甚微可不論故今法徑借黃道交角以朔望黃白交角加減之而白道交角不必立表舊法定日食限陰厯初宮十七度四十分以

內五宮十二度二十分以外陽厯六宮八度二十分以內十一宮二十一度四十分以外實交周入此限者並有食今法定食限陰厯稍寬陽厯稍狹實交周自五宮十一度四十五分至六宮六度十四分又自十一宮二十三度四十六分至初宮十八度十五分為的食不入限者不必算亦有入限而不食者則因三差故

西法羅
睪為正

交交道自外而入內計都為中交交道
自內而出外中厯反之名易而實不易

康熙四十三年五月十七日乙卯望月食監頒圖梅先

生謂圖中所注食既至食甚時刻多食甚至生光時刻
少相差十分謂其不應改法愚疑此頒圖時字有脫誤
也

蓋生光丑正二刻十一分脫十字誤作一分

否則誠難解

論中西法異者多端

問梅先生謂中西二法本同新厯但兼用其長以補舊
法之未備惟五星有交點有緯行是中厯缺陷之大端
然則西法之異於中法止此一事與曰先生舉其大者
耳其他若中厯太陽盈縮常定於冬夏二至西法則最

高最卑有行度中厯太陰遲疾但知有轉終而不知更有二三均加減中厯交食時差但知以午正為加減之限而不知有黃平象限中厯太陽太陰之徑閭虛之徑恒為一定而不知有高下大小之差法之異者固多端若三角立算中法只知有直角句股而不知有鈍角銳角與弧三角弧矢割圓中法未盡其用而西法則有八線表預定無數句股以為一切測算之準繩此皆有補於中厯者也

補論十二宮

問梅先生論周天十二宮有直有衡有斜有百游不甚紛紜錯雜歟曰是皆各有所宗各有所取用非雜也愚謂在天猶有不變之十二宮蓋列宿之天分為四維析為十二次星紀鶉首等名西國則有磨羯巨蟹等名皆以星象定之古今不變者也此與黃道之十二宮同歸而殊塗恒星天亦宗黃極是同歸也列宿自布十二宮恒以虛六度為元枵之半斗四度為磨羯之初歲歲推

移不與中氣節氣相直是殊塗也梅先生厯學疑問補中極論此理但未言其不變之十二宮耳

又按七政小輪無論大小皆分十二宮此自厯家虛立之以便算故梅先生不數

論西法六十分為度

問回回厯雖以三百六十度為周天而一度用百分或萬分與授時同

見袁氏厯法新書

歐邏巴獨以六十分為度秒微

以下皆用六十遞析八線表亦分一度為六十何也曰

其源蓋由於時刻也中法一日百刻不便於分布西法以九十六刻齊之一時均得八刻又分一時為二時謂之小時分一刻為十五分凡加時與日出入皆有分數

可紀

中法萬分日雖甚細而發數加時及日出入皆紀刻不紀分猶為粗疎西法則紀刻分分下之秒未

過半棄之已過半收之

今四刻六十分為一小時此六十分所由

來也而秒微以下皆用六十則作表甚便

第一格為時第二格為分

第三格為秒第四格為微所列之數皆同

又如以度變時以時變度則以四

分當一度一小時當半宮亦甚便日法如此度法亦因

之八線表亦因之則各率通為一法此歐邏巴立法斟酌盡善者也彼百刻不便分布刻下不能紀分似不可謂無弊薛儀甫著天學會通改六十分為百分則當先改八線表而餘諸表皆不可用亦覺更張多事謹案

聖祖仁皇帝御製曆象考成度法用六十日法一十四百四十別以一萬為日周通法其布算也以萬分計餘分而仍以日法通之如法收為時刻兼用授時而不用百刻之法此則萬世可遵行者也

論授時厯周天歲周

自大衍厯分天自為天歲自為歲以著歲差之理厯代
遵用至郭氏別出新意以萬分為度即以萬分為日周
天三百六十五萬二千五百七十五分歲周三百六十
五萬二千四百二十五分自當時觀之立法若盡善矣
由今日論之二者皆非至極之理也夫黃道與列宿天
同為大圜雖高下懸殊度之廣狹迥異而度數則同非
周天之度分多於周歲之度分也歲已周則黃道周矣

而不能踵其星之故處非歲有不滿之度分也星自移而東耳譬之太陰二十七日有奇即周天其不能逐及於日者日自行二十餘度耳乃以三百六十五度二千五百七十五分為周天是并其移動之一百五十分亦算在周天之內則二十八宿之度不溢出一百五十分乎又歲實有平有汎論平歲實只有三百六十五萬二千四百二十一分八十七秒五十微而當時以汎歲實定為歲周則又多出三分一十二秒五十微矣論正法

當即以歲周為周天以三百六十五度二千四百二十一分八十七秒五十微分隸之於二十八宿別以今率恒星每歲東行五十一秒變為日度之分秒微以為歲差始盡善無弊當時最卑行與恒星行兩竅未啓是以立法甚難此不可不原其情亦不可不知其有未當處也

論厯法隨時修改

厯取象於革久之不能不改非久亦不能改各平行率

有積之數十年微覺其差而即改者

如最卑行

有通前後數

百年或千餘年測準之度分用以相距定為平行其尾

數或有未真必甚久而後可改者

如七政平行

有前人立法

未精改之而加密者

如日食加時東西差昔以午正為限後改用黃平象限近又以白道

算定交角

有前人用法稍煩改之而徑捷者

如六曜求初均昔用平三角今

算直角

若夫黃赤相距之緯古闊而今漸狹太陽本輪均

輪之半徑古大而今漸小此二差出於常理之外前不

知若何而始後不知若何而極非法之所能馭惟隨時

密測改表以合天行耳

黃赤相距西史第谷測得二十三度三十一分半今測

得二十三度二十九分三十秒

康熙五十三年臺官密測立表今又當稍減矣太

陽本輪均輪兩半徑併昔用十萬分之三千五百八

十四或以一千萬為本天半徑則為三十五萬八千四百

一十六日躔加減差表三宮九宮初度其均度二度

三分一十秒平春分與定春分相距二日一小時有奇而

今平春分與定春分相距一日二十二小時弱則最大

之均度一度五十五分

比舊約少八分

本輪均輪兩半徑合

得三十三萬五千四百有奇耳

黃道為諸道之宗太陽為衆曜之君有此二差則
六曜之出入於黃道離合於太陽者亦因之而小有
改變

兩半徑雖改算太陽均度舊表亦可借用

以三五八四為一率舊表均數

化秒為二率今改三三五四有奇為三率求得四率為秒以度分收之為今時加減均數

數學卷一

欽定四庫全書

數學卷二

婺源江永撰

歲實消長辨

歲實消長前人多論之者勿菴先生大約主驟時而亦疑其百年消長一分以乘距算其數驟變殊覺不倫又謂今現行之歲實稍大於授時其為復長亦似有據因為高衡近冬至而歲餘漸消過冬至而復漸長之說蓋存此以俟後學之深思永別為之說謂平歲實本無消長而消長之故在高衡之行與小輪之改兩歲節氣相距近高衡者歲實稍贏近最高者稍朒猶定朔

定望定弦之不能均惟逐節氣算其時刻分秒而消長可勿論也管見如斯遂不能強同爰引

先生之言遂節疏論於下

勿菴先生曰

應學問答

授時以萬分爲日故其歲實三百六

十五萬二千四百二十五分其數自至元辛巳歲前天

正冬至積至次年壬午歲前天正冬至共得三百六十

五日二十四刻二十五分若逆推前一年亦是如此自如

庚辰年十一月冬至逆推至己卯年十一月冬至亦是三百六十五分二十四刻二十五分此歲實

之數大統與授時並同

永按歲實為歷法大綱領得其真確之數為難四分
歷以前無論已魏晉以後漸知一歲小餘不及四分
日之一隨時測驗一歷必更一斗分不久即有差此
何以故蓋步歷者泥履端於始之義但以歲前冬至
距今年冬至計其小餘時刻并入大餘以為歲實不
知冬至距冬至所得者活汎之歲實而非經恒之歲
實也欲得經恒歲實宜於近春分時測之
元至元時當測定氣
分春今歲春分距來歲春分苟得真時刻則得真歲實

又以前後遠年測準之春分計其日時分秒均之各歲則歲實之恒率確矣此何也太陽因有高卑而生

盈縮近數百年間春分則平行

當郭氏作歷時定氣春分之日正當平行

之處此以前以後雖有此亦甚微

故所得歲實為恒率得其恒乃可

以求其定猶之月必有平朔之策而後可求定朔也

郭太史改厯自言創造簡儀高表憑所測實數考正

者七事一曰冬至二曰歲餘其於歲實考之詳矣其

求冬至也自丙子年立冬後依每日測到晷景逐日

取對冬至前後日差同者為準得丁丑年冬至在戌
戌日夜半後八刻半又定戊寅冬至在癸卯日夜半
後三十三刻巳卯冬至在戌申日夜半後五十七刻
庚辰冬至在癸丑日夜半後八十一刻辛巳冬至在
巳未日夜半後六刻

從甲子日始五十五日零六刻
氣應五十五萬零六百分為厯

元其求歲餘也自劉宋大明以來測景驗氣得冬至

時刻真數者有六用以相距各得其時合用歲餘考
驗四年相符不差仍自宋大明壬寅年距至今八百

一十九年每歲各得三百六十五日二十四刻二十五分減大明厯一十一秒其二十五分為今厯歲餘合用之數愚以此二條考之即郭氏當年所定之歲實已有微差稽之於史又多牴牾其可以是為消長之準乎夫一歲小餘二十四刻二十五分積之四歲正得九十七刻無餘無欠丁丑年冬至在戌戌日夜半後八刻半則辛巳年冬至宜在巳未夜半後五刻半不應有六刻如以辛巳之六刻為確也則丁丑年

宜在九刻不應只有八刻半此四年既皆實測所得

則已亥半刻矣而云相符不差何也

丁丑年之八刻半雖約取整數

未必正是半刻然已有數十分矣其本法上考已往百年而長一刻四年所長甚微不應有半刻以下然

則當時冬至歲實刻下之小餘不止二十五分矣

又考劉宋孝武帝大明五

年辛丑祖冲之所測十月十日壬戌景長一丈七寸

七分半十一月二十五日丁未一丈八寸一分太二

十六日戊申一丈七寸五分強以壬戌戊申景相較

餘二分二釐半為實以丁未戊申景相較餘六分五

釐為法以法除實得三十四刻六十分以減距日四

千六百刻餘四千五百六十五刻四十分折取其日

二千二百八十刻七十分加半日刻午正測景得二千三百三

十二刻七十分命壬戌算外得十一月三日乙酉夜

半後三十二刻七十分劉宋都建康比元大都里差

冬至三十二刻一十三分按劉宋時太陽最高衡

在冬至前幾半宮則取冬至前後二十餘日之景折

取中數以求冬至仍有辰初三刻冬至大都減大明

壬寅辛丑年之十一月

即壬寅歲之始下距至元辛巳八百一十九

年以授時歲實積之凡二十九萬九千一百三十三日六十刻七十五分以乙酉辰初三刻距己未丑初一刻凡二十九萬九千一百三十三日九十二刻較多三十三刻而云自大明壬寅距今每歲合得此數

何也

如郭氏百年長一之法以八百一十九總乘所長之數則壬寅冬至甲申日七十九刻太較當

時所測算者又先五十餘刻則失之愈遠矣○詳冬至權度 又云減大明歷一十

一秒考祖冲之大明歷紀法與周天一歲小餘二十四刻二十八分一十四秒授時減去三分一十四秒

亦非一十一秒也

邢士登律厯考謂金時超知微重修大明厯小餘二十四分三十六

秒實多授時一十一秒郭所然則授時減者趙厯非祖厯也其說是

所定歲實猶是近似活泛之數而不可

以為恒欲定經恒之歲實則西厯恒年表之恒率是

矣按表一歲小餘五小時三刻三分四十五秒

二十日

四小時一小時四刻一以分通之三百四十八分有刻十五分一分六十秒

奇以秒通之二萬〇九百二十五秒

一日八萬六千四百秒

考

其實則回回厯已如此回回厯法一歲三百六十五

日歲有十二宮宮有閏日一百二十八年閏三十一

日然則一歲閏一百二十八分日之三十一正西法

之歲餘也

以一百二十八乘二萬〇九百二十五得二百六十七萬八千四百以八萬六千四

百除之得三十一是也

回回厯以春分為歲首其歲餘由累測

春分得之歐邏巴厯遂用之至今因之雖分下之四

十五秒未必無眇眇當亦甚微矣以此平率為準隨

其時之最高衝與最高之行而進退焉冬至近高衝

則兩歲冬至之距必多於平率

今時多一分弱夏至近最高

則兩歲夏至之距必少於平率

今時少一分弱猶之太陰當朔時入轉兩

朔相距之日時必多當望時近月李兩望相距之日時必少若朔時近月李望時近入轉兩朔兩望相距

反又古時太陽本輪均輪半徑之差大於今日則加

減均數亦大而冬至歲實當更增至元辛巳間高衡

約與冬至同度則歲實尤大其小餘刻下之分約有

三十分而授時定為二十五分宜其自丁丑至辛巳

四年之間即有半刻之差而郭氏未之覺也

一年少五分四

年少二十分幾於半刻之半矣丁丑年之八刻半本為約畧之數半刻以下固難測算真的也○以西法

歲餘依授時萬分日較之只有二十四刻二十一分
八十七秒半少授時歲餘三分一十二秒半當時冬
至為盈初小輪半徑差又大其多
於平率必不止三分有奇者也

然授時原有消長之法是其新意其法自辛巳元順推
至一百年則歲實當消一分

依法推至洪武十四年辛巳滿一百年其歲實消一

分為三百六十五日二十四刻二十四分若自辛巳元逆推至一百年則歲

實當長一分

依法推至宋孝宗淳熙八年辛丑滿一百
年歲實長一分為三百六十五日二十四

刻二十每相距增一百年則歲實消長各增一分以是

為上考下求之準大統諸法悉遵授時獨不用消長之

法上考下求總定為三百六十五日二十四刻二十五分此其異也

永按冬至相距之歲實大於平率最高衝有行度而小輪均數又有大小宜其歲實有消長分數然必當時測定之歲實已真確又知其無可復加而後知將來之漸消若授時歲餘刻下之二十五分尚非確數其差分已見端於丁丑辛巳四年之間則辛巳以後能必其果消乎郭太史厯考正者七事創法者五事

皆不數歲實消長蓋未能真知所以消長之故但暗用楊忠輔統天厯為活法以推往古意謂下考將來亦如是耳明大統厯悉遵授時獨不用消長之法當時厯官元統非有確見實測知其不當用消分也以今觀之猶幸大統不用消分冬至縱有先天尚未甚遠倘遽改二十五分為二十四分其先天不愈多乎

當至元時刻下小餘約有三十分授時一歲少五分百年約先天五刻

歲實即一年之日數自一年以至千百年共積若干是

為積日亦謂之中積

上考下求皆距至元辛巳立算

假如今康熙庚午

歲相距四百零九算依授時法推得積日一十四萬九

千三百八十四日零一刻八十九分

因距算四百以上歲實當消四分為

三百六十五日二十四刻二十一

分以乘距算四百零九得如上數大統不用消長則積

日為一十四萬九千三百八十四日一十八刻二十五

分兩法相差一十六刻三十六分

以命冬至日辰授時得癸卯日丑初三刻

大統得癸卯日卯初三刻

永按凡天行盈縮進退必以漸無驟增驟減之理郭

氏百年消長一分則是百年之內皆無所差至一百零一年驟增減一分又越百年皆平差一分至二百零一年又驟增一分豈有此數與法乎即如其法算數百年後亦當逐節計其消分積而數之不當總計當消之分而以距算總乘之也如大統厯康熙庚午冬至癸卯日卯初三刻查時憲書乃是巳初一刻

統大

先天一十四刻授時大統用消分均之無當於天行其故何

哉當年所測歲實刻下小餘其數不真故也歲實已

弱矣而又消之安得不先乎使當改二十五分為
三十分由辛巳以後漸而消之或庶幾耳曰至元歲
餘若果二十四刻三十分則上考當長乎消乎曰上
考亦消也蓋至元時高衝與冬至同度小輪均數又
最大故冬至歲實為長極之時而上考下考皆當消
但消於三十分之內非消於二十五分之內也

今時高衝

在冬至後七八度小輪又漸小冬至歲餘以萬分日計之約二十四刻二十八九分之間劉宋大明時高衝在冬至前半宮以祖冲之紀法除其歲周當時歲實三百六十五日二十四刻二十八分一十四秒可

見至元前後皆消於三十分之內其消甚遲約四百餘年始消一分蓋小輪均數在初宮有若干平差故也
至一宮以外則漸疾矣 若以春分平歲實相較則冬至歲實上

下數千年皆在長限之中而至元時尤為長之極必俟高衝行至春分則冬至歲實始平

如今之春分

又數千

年高衝行至夏至最高行至冬至則冬至歲實始為

消之極耳

如今之夏至

然冬至歲實消則春分歲實長冬

至歲實消之極則夏至歲實又為長之極矣抑今日本輪差小古時差大則消長中復有消長苟知此理

則後之治厯者但隨時測高衝之行與小輪之差以
算定氣而歲實消長俱可勿論猶之太陰但實算定
朔定望定弦不必復計此月與彼月多於朔策幾何
少於朔策幾何也

又曰

厯學
疑問

問歲實既有一定之數授時何以有消長之

法曰此非授時新法而宋統天之法然亦非統天億創
之法而合古今累代之法而為之者也

永按統天厯宋寧宗時楊忠輔所造其歲實與授時

正同以斗分乘距差為躔差暗藏加減之法約百年
加減一分零六秒弱然行之未久鮑潁之造開禧厯
臧元震造成天厯皆增歲實改各率紛紛竟無定論
云

蓋古厯周天三百六十五度四分度之一一歲之日亦
如之故四年而增一日其後漸覺後天皆以為斗分太
強因稍損之

永按古厯四年而增一日其術甚疎雖古斗分宜多

亦百數十年即當後天一日何以自周迄漢久而後
覺曰周之厯却失之先天僖公五年辛亥日南至昭
公二十年己丑日南至皆先天二三日厯數百年以
有餘之歲實盈其所先之數乃適得其平

約在周
秦間厥

後猶執四分之術漸失之後天故久而後覺耳

自漢而晉而唐而宋每次改厯必有所減以合當時實
測之數故用前代之厯以順推後代必至後天以斗分
強也

斗分即
歲餘

若用後代之厯據近測以逆溯往代亦必

後天以斗分弱也

永按漢已前之冬至非實測先後天或至二三日後漢末劉洪始覺其後天而改斗分東晉虞喜始立歲差法後秦姜岌始知以月蝕衝檢日宿度所在而劉宋之初冬至猶後天三日大明時祖冲之始解於測景以冬至前後二十餘日之景比對取中而定冬至然後冬至日躔漸得其實猶不能盡合也故唐一行謂麟德厯已前實錄所記乃依時厯書之非候景所

得郭太史謂自大明厯以來測景驗氣得冬至時刻
真數者有六然則實測之能合天者亦鮮矣

統天厯見其然故為之法以通之於歲實平行之中加
一古多今少之率則於前代諸厯不相乖戾而又不違
於今之實測此其用法之巧也然統天厯藏其數於法
之中而未嘗明言消長授時則明言之今遂以為授時
之法耳郭太史自述創法五端初未及此也

永按授時厯實暗用統天之法者也其歲餘二十四

刻二十五分與統天同而上推百年長一之法亦相
似故授時厯議謂自魯獻公戊寅至至元辛巳冬至
日名共四十九事授時法合者三十九不合者十統
天不合者惟獻公戊寅與授時異餘三十八與授時
同二厯推冬至畧相似也然而劉宋大明壬寅歲前
冬至乙酉夜半後三十二刻七十分則當時祖冲之

測景推算所得者縱有未確亦不甚遠

當時所算約後天十六刻

詳見冬至權度

依授時統天法皆推甲申日戌初初刻先天

甚多豈可謂大明非而授時統天是歟郭氏謂自大明以來測景驗氣得冬至時刻真數者有六用以相距既以大明壬寅之冬至為得真數之首矣及用法推算即失此至乃謂日度失常其可乎以今觀之一由授時所定歲餘本未真一由長數當漸積不當總計長分而以八百一十九距算總乘之也

統天距差乘差躔差

減汎積失亦畧同

然則大統厯何以不用消長曰此則元統之失也當時

李德芳固已上疏爭之矣然在洪武時去授時立法不過百年所減不過一分積之不過一刻故雖不用消長無甚差殊也崇禎歷書謂元統得之測驗竊不謂然何也元統與德芳辨但言未變舊法不言測驗有差又其所著通軌雖便初學殊昧根宗間有更張輒違經旨如月食時差既內分等俱妄改背理豈能於冬至加時先後一刻之間而測得真數乎

永按明初李德芳與元統爭歲實消長為歷家一段

公案關係有明二百餘年之厯法邢士登恨元統不用消分致萬厯間節氣後天九刻有奇愚有以斷之據授時歲實上考固宜有長分矣然而授時之歲餘本未確則所據以為長之端者亦未真既言每百年長一分則當以漸而長乃總計長分以乘距算則又無此算法觀其推至大明壬寅已違當時之實測又何論春秋以前乎德芳所據者謂魯獻公十五年戊寅天正甲寅冬至依授時法推得甲寅日夜子初三

刻依大統法推得己未日午正三刻

己未史誤作丁巳

相差

四日六時五刻當用至元辛巳為元及消長之法方合天道夫魯獻公之年史有舛錯本難憑信漢志謂獻公十五年甲寅冬至此自劉歆三統厯逆推當年冬至是甲寅耳豈有實測紀之信史哉而德芳以此駁元統其無卓識可知矣然元統之不用消長也初無實據但云上考下推不用消長以合天道又云天道無端惟數可以推其機天道至妙因數可以明其

理理因數顯數從理出故理數可相倚而不可相違
夫既未嘗實測而憑虛以言天道言理數宜其不能
服德芳也今日厯學大明由後觀之前此二百餘年
猶幸元統不用消分冬至加時先天尚未甚遠蓋授
時歲餘一歲約少五分自至元辛巳至洪武甲子一
百零三年固已先天五刻矣使大統減一分又越百
年二百年而更減之先天不愈多乎邢士登謂萬厯
間大統厯後天九刻此非有所測驗但據用消分與

不用消分積算如此豈知明厯皆失之先天乎觀前
所舉康熙庚午年時憲書癸卯日巳初一刻冬至依
大統算卯初三刻先天一十四刻若依授時算丑初
三刻則先天三十刻自辛酉溯戊辰五十餘年約減
二三刻則戊辰以前大統厯率先天十一二刻若用
授時法先天遂至二十七八刻矣此豈可厚非大統
乎

然則消長必不可廢乎曰上古則不可知矣若春秋之

日南至固可考據而唐宋諸家之實測有據者史冊亦具存也今以消長之法求之其數皆合若以大統法求之則皆後天而於春秋且差三日矣安可廢乎

永按春秋時厯法最疎置閏或疏或密日食或不在朔則步冬至違天可知僖公五年丙寅正月辛亥朔日南至以今法推此年平冬至乙卯日巳時定冬至在甲寅即令此時小輪均數大能使定氣移前一日半亦不過癸丑日之夜刻辛亥實先天二三日且定

朔壬子亦非辛亥也昭公二十年己卯二月己丑日南至以今法推此年平冬至壬辰定冬至辛卯當時推己丑亦先天二日且己丑為此年正月朔安得為二月也授時推僖五年冬至以歲餘長十九分乘距算一千九百三十五加於中積得辛亥日寅初二刻是以總長分數乘距算而非積漸而長亦因傳有辛亥日南至之文強為此算以求合不知辛亥非實測

也

唐一行謂僖公登觀臺以望而書雲物出於表晷天驗非時史億度愚謂傳言書雲未嘗言測景

其推昭二十年冬至以十八乘距算一千八百零二則不得已丑而得戊子日戌初三刻其先天愈甚矣此二事一合一否皆不足為據且既能上合一千九百餘年之冬至矣何以劉宋元嘉丙子十一月甲戌景長而推癸酉大明辛丑十一月乙酉冬至即壬寅天正冬至而推甲申此二事皆八百餘年反先天一日豈非總分乘距算之法非法故失之乎

然則統天授時之法同乎曰亦不同也統天厯逐年迭

差而授時消長之分以百年為限則授時之法又不如
統天矣

永按統天以距差乘躔差其失亦與授時等

由其根數未確

夫必百年而消長一分未嘗不是乃以乘距算其數驟

變殊覺不倫鄭世子黃鍾厯法所以有所酌改也

假如康熙

辛酉年距元四百算故消四分而其先一年庚申距算
三百九十九只消三分是庚申年歲餘二十四刻二十

二分而辛酉年歲餘二十四刻二十一分也以此所消
之一分乘距算得四百分則辛酉歲前冬至忽早四刻

而次年又只平運以實數計之庚申年反只三百六十
五日二十刻二十二分辛酉年則又是三百六十五日

二十四刻二十
一分其法舛矣

永按授時之謬法勿菴先生亦既覺之矣抑不惟如
此而已年愈遠則失愈甚如推至春秋時一千九百
年則歲餘二十四刻四十四分若一千九百零一年
歲餘增一分此一分乘距算一千九百零一前一歲
忽增一十九刻有奇則歲實有三百六十五日四十
三刻有奇豈不甚可笑乎況又有遠於此者乎

問歲實消長之法既通於古亦宜合於今乃今實測之

家又以為消極而長其說安在豈亦有所以然之故與
曰授時雖承統天之法而用消長但以推之舊厯而合
耳初未嘗深言其故也惟厯書則為之說曰歲實漸消
者由日輪之轂漸近地心也余嘗竊疑其說今具論之
夫西法以日天與地不同心疏盈縮加減之理其所謂
加減皆加減於天周三百六十度之中非有所增損於
其外也如最高則視行見小而有所減最早則視行見
大而有所加加度則減時矣及其加減既周則其總數

適合平行畧無餘欠也若果日輪之轂漸近地心不過其加減之數漸平耳加之數漸平則減之數亦漸平其為遲速相補而歸於平行一也豈有日輪心遠地心之時則加之數多而減之數少日輪心近地心時則減之數少而加之數多乎必不然矣

永按冬至相距之日時古今有多少不過汎歲實與平歲實相差其相差又有舒疾之漸耳若今冬至有平有定本不必言消長必欲言其消長則其故有二

一由高衝離冬至有遠近一由日小輪古今有大小也高衝自秋分行至冬至此三宮定冬至皆在平冬至前自冬至行至春分此三宮定冬至皆在平冬至後總此六宮上下約萬年

以今時最高衝行約之

皆在長限以

其冬至汎歲實皆多於平歲實故也惟高衝正當秋分春分此兩歲歲實皆平

即西法三百六十五日五小時四十八分四十五秒

是離此則漸有差前三宮由平而漸增多是為長中之長至高衝與冬至同度則定冬至與平冬至同日

同時是為長之極當郭太史作厯正其時也後三宮
由極多而漸減以至於平是為長中之消今時高衝
在冬至後八度其消尚未多也若高衝過春分而行
至夏至此三宮定冬至亦在平冬至後自夏至行至
秋分此三宮定冬至又在平冬至前總此六宮亦約
萬年皆在消限以其冬至汎歲實皆少於平歲實故
也前三宮由平而漸減是為消中之消至高衝與夏
至同度則定冬至亦與平冬至同日同時是為消之

極後三宮由極少而漸增以至於平是為消中之長
此通高衝行一周天而總論其消長也然而太陽兩
小輪半徑三千五百八十四古多而今少多則小輪
稍大日躔加減均亦稍大少則小輪稍小加減均亦
稍小高衝之行一年一分一秒十微西士後測此一分一
秒十微若在均數稍大之中則度分變為時分之秒
數以加減於平時者必稍多若在均數稍小之中則
度分變為時分之秒數以加減於平時者必稍少崇如

積戊辰所立之加減差表初宮之初度十一宮之末
度每一十分均數二十二秒高衡一年行一分一秒
十微約均數二秒有奇此二秒有奇變為時約五十
七秒以加於平歲餘五小時三分四十五秒得五十
時四分四十二秒如一歲高衡之行不止得均二秒有
不止二十二秒而一歲高衡之行不止得均二秒有
奇其變時亦不止五十七秒矣如小輪稍小則初度
十分不及二十二秒高衡之行得均數不及二秒則
變時亦不及五十七秒矣此累舉
初度之均以為例其他可類推
古今小輪之大小

雖不可盡知以劉宋元嘉大明間屢年之實測算當

時之不同心差蓋四千有奇

詳冬至權度

則均數必稍強

至元授時歷冬至盈初加分多於今日之加分則當

時小輪半徑不止三千五百八十四自此以後至今
日小輪漸小均數亦漸小高衝行度所得之均數以
減度加時者亦稍弱焉此又因輪轂漸近地心而微
有消分也

又考日躔永表彼固原未有消長之說日躔厯指言平
歲用授時消分定歲則用最高差及查恒年表之用則
又只用平率是其說未有所決也

永按厯書非出一手故有不相應處其歲實平率出

回厯回厯得之實測春分此厯書最緊要處惜未明白剖析其日躔表說辨論從前言消長者之非則固有定說矣但小餘微有不同耳

厯書平歲實小餘五小時三刻三分四十

五秒以萬分通之是二四二一八七五也今厯象考成亦用之而日躔表說二四二一八八六四較多一

四一

又厯書言日輪漸近地心數千年後將合為一點若前之漸消由於兩心之漸近則今日之消極而長兩心亦將由近極而遠數千年後又安能合為一點乎彼蓋見

授時消分有據而姑為此說非能極論夫消長之故者也

永按七政皆有小輪獨日之小輪有改變竊意久亦必復豈有與地心合為一點之理自至元辛巳以後正是長極而消非消極而長也曰今實測之冬至後於授時之中積分明是長而以為消何也曰前已言之矣授時歲餘刻下之分當有三分而郭氏定為二十五分也授時之歲實豈非出於實測然因其自

述丁丑辛巳四年冬至得其自相乖違之處因以知
至元時為長極而消之大界與日躔加減表十一宮
末度以前均數漸減之理固相符也

然則將何以求其故曰授時以前之漸消既徵之經史
而信矣而今現行厯之歲實又稍大於授時其為復長
亦似有據竊考西厯最高卑今定於二至後七度依永
年厯每年行一分有奇則授時立法之時最高卑正與
二至同度而前此則在至前過此則在至後豈非高衝

漸近冬至而歲餘漸消及其過冬至而東又復漸長乎
余觀七政厯於康熙庚申年移改最高半度弱而其年

歲實驟增一刻半強此亦一徵也存此以俟後之知厯

者已未年最高在夏至後六度三十九分庚申年最高在夏至後七度七分除本行外計新移二十七分已

未年冬至庚戌日亥正一刻四十分庚申年冬至丙辰日寅正二刻二分實計三百六十五日二十四刻十三分

前後各年俱三百六十五日二十三刻四分或五分以較庚申年歲實驟增一刻九分

永按歲實消長之故一由最高衝之有行度先生因
最高改移歲實驟增而悟及此猶云存之以俟知者

亦欲後人由此致思也然其所言消長若與實算相反何也日躔加減表初宮與十一宮同均而加減異號至元辛巳以前高衝行未及冬至則用初宮之均度分秒加度而減時辛巳以後高衝行已過冬至則用十一宮之均度分秒減度而加時前減時則定冬至在平冬至前後加時則定冬至在平冬至後初宮之初度與十一宮之末度其均最大則一歲高衝之行所得均數最多變為時以加減於平時者亦最多

故此處歲實極大皆最長之時也初宮若離初度稍遠則均漸少而變時以減平時者亦稍少歲實亦稍減矣十一宮若離末度稍遠則均漸少而變時以加平時者亦稍少歲實亦稍減矣故高衝行漸近冬至其均由少而多歲實正漸增以至於極也而此謂歲餘漸消高衝已過冬至其均由多而少歲實則由極多以漸減也而此謂復漸長豈非與實算相反乎蓋先生論消長不主平歲實為根耳

王寅旭曰歲實消長其說不一謂由日輪之轂漸近地心其數漫消者非也日輪漸近則兩心差及所生均數亦異以論定歲誠有損益若平歲歲實尚未及均數則消長之源與兩心差何與乎識者欲以黃赤極相距遠近求歲差朏朒與星歲相較為節氣消長終始循環之法夫距度既殊則分至諸限亦宜隨易用求差數其理始全然必有平歲之歲差而後有朏朒之歲差有一定之歲實而後有消長之歲實以有定者紀其常以無定

者通其變始可以永久而無弊

永按古今言歲實消長者皆從冬至歲實言之非論
平率歲實也因兩心差及所生均數異而定氣微有
損益是亦消長之一根不可謂其無與若黃赤極相
距遠近求差數此說恐未然其言有平歲之歲差而
後有朏朒之歲差有一定之歲實而後有消長之歲
實此數言極中肯綮一定之歲實從春分測定之平
歲實是也苟知此則但言平冬至定冬至不必言消

長亦可矣

按寅旭此論是欲據黃赤之漸近以為歲實漸消之根
蓋見西赤黃赤之緯古大今小今又覺稍贏故斷以為
消極復長之故然黃赤遠近其差在緯歲實消長其差
在經似非一根又西測距緯復贏者彼固自疑其前測
最小數之未真則亦難為確據愚則以中歷歲實起冬
至而消極之時高衝與冬至同度高衝離至而歲實亦
增以經度求經差似較親切愚與寅旭生同時而不相

聞及其卒也乃稍稍見其書今安得起斯人於九原而相與極論以質所疑乎

永按先生經緯之辨最確而謂高衝與冬至同度為消極之時永已論之於前

又曰

考最高行及歲餘

按日行盈縮細考之則春分距夏至夏至

至距秋分雖皆縮厯而其縮亦不同秋分距冬至冬至距春分雖皆盈厯而其盈亦不同又且年年不同細求之則節節不同又細求之其日日不同矣其故何也蓋

最高一點不在夏至而在其後數度又且年年移動此
太陽盈縮之根而歲實所以有消長也

永按以太陽盈縮之根推歲實所以有消長此先生
之定見定說也

按庚申年夏至至冬至一百八十三日十三刻六分辛
未年夏至至冬至一百八十三日十四刻九分十二年

中共長一刻○三分

中積只
十一年

壬戌年冬至至次年夏至

一百八十二日九刻九分庚午年冬至至次年夏至一

百八十二日八刻十分九年中共消十四分

中積共
只八年又

合計癸亥夏至至前半周一百八十二日九刻九分冬至前半周一百八十三日十三刻十分相較一日○四刻一分辛未夏至前半周一百八十二日八刻十分冬至前半周一百八十三日十四刻九分相較一日○五刻十四分八年中較數增一刻十三分

永按此以半年之氣前後相較驗最高之東移若以兩歲冬至春分夏至秋分及各節氣兩歲相距皆各

有其歲實而冬至為最大夏至為最小春秋分為近平又越數十年而諸歲實亦微有不同矣前代只知冬至歲實不知逐節氣皆有歲實也

然二分之相距則無甚差何也蓋最高移而東則夏至後多占最高之度而減度加時之數益多故益長高衝移而東則冬至後多占最早之度而加度減時之數益多故益消其近二至處皆為加減差最大之處故消長之較已極也乃若二分與中距雖亦歲移而中距皆為

平度不係加減其最高前後視行小之度固全在春分
後半周最高衝前後視行大之度亦全在春分後半周
毫無移動故無甚消長也

永按二分無甚差故欲得平歲實須於近二分時測
之若高衝行至春分則二分之距又最大而二至反
平矣

按授時消分為不易之法今復有長者何也西法最高
卑之點在兩至後數度歲歲東移故雖冬至亦有加減

不得以恒為定也此是西法中一大節目其法自回回
厯即有之然了凡先生頗採用回回法而不知此熊礪
石先生親與西儒論厯而亦不言及何也

永按最高卑之有行度誠西法中一大節目袁氏新
書不知有最高卑又何以能較論前代諸厯之先後
天乎

又曰

厯學
疑問

袁了凡新書通回回之立成於大統可謂苦

心然竟削去高卑之算又直用大統之歲餘而棄授時

之消長將逆推數百年已不效況數千萬年之久乎

永按袁書逆推數百年已不效誠然若棄授時之消
長則無足論授時本非不刊之法也今時厯象考成
推步只有求天正冬至與求定冬至之法而不言消
長紛紛之論可定矣

數學卷二